

欽定重修兩浙鹽法志

欽定重修兩浙鹽法志卷十五

條約一

周官大司徒掌教萬民州長黨正以下皆有月吉
讀灋之典至周備也嵯業上關

國課下切民生兩浙三吳幅員修廣尤稱繁劇莅茲
任者有緝私之責有裕課之方有恤商惠竈之政
利何以興道在勸之而勿壞害何以去法在禁之
於未然是故煎銷有定所毋許越畔則畛域宜嚴
也交易有成規毋許違制則稽防宜密也官攢團

保以及分巡兵役毋許作奸犯科則儆戒宜申也
與以範圍而不過示以

功令之當遵俾刁頑者知所警惕醇良者識所據依
庶幾令出惟行法立不犯烝烝臻上理焉志條約
一順治四年正月巡視兩浙鹽政爲整飭官方事照
得有司賢否黜陟攸關官評輿論耳目難掩本院
職司鹽課唯以通商惠民爲官方第一義

國課之盈絀民生之安擾政事之廢修利弊之興革
地方各官苟不殫心竭力貽害地方卽以白簡從

事斷不瞻徇情面致負

簡命功令森嚴各宜愛鼎其砥名節如或敗檢溺職

國典具存勗哉無斁

一順治四年二月巡視兩浙鹽政爲季掣引鹽事照
得兩浙行鹽引額繁多派分四季疏銷歷來成例
今逢

聖世惠商恤竈加意撫綏產鹽甚廣本院遵照舊例及
時親臨按所秤掣誠恐各商賢愚不一罔利行私
亦未可定若不嚴加懲勑何以儆戒奸頑爾等務

遵

功令將捆運到所官鹽照依部頒掣子搥配較準勿得逾額重斤本院臨掣之日逐引秤盤敢有浮重斤數夾帶餘鹽影漏飛渡等弊定將該商按法嚴處引鹽入官斷不姑寬致滋漏網

一順治四年四月巡視兩浙鹽政爲清查漲墾等事查得新漲沙地俱勘明給竈如有占據不吐挈究其有民間開墾成田者於竈戶名下追償工本其田俱歸竈戶

一順治四年五月巡視兩浙鹽政爲嚴禁煎鹽插和灰土事查得各場煎燒竈戶不許插和灰土貨賣官商亦不得圖賤買掣以致民食不堪違者依律治罪

一順治九年二月兩浙鹽法道爲亟救窮黎設法保全課命事據仁和場竈戶張豪等呈稱豪等貧竈所靠沙地刮土樵薪養蘆煎燒完課今祖分辦課命地坐落清泰門盡爲營兵牧放牛馬薪爲踐食地爲蹂躪憑何刮土煎燒貧竈豈能點金完課哀

金匱要略卷之二十一
叩普救生黎賜文詳院示禁庶

國課有賴等情該本司隨查看得民竈錢糧皆從產
辦今兵丁放牧牛馬蕩地蘆薪悉爲蹂躪踐食刮
土煎燒盡歸烏有各竈歷辦無產之課故有斯控
蕩地乃

國課民命攸關伏候憲批嚴禁等因詳奉總督部院
巡撫都察院固山額真巡按察院兩浙鹽院批示
嚴禁毋許兵丁牧放合行給示勒石永遵

一順治九年八月巡視兩浙鹽政爲禁遏鹽徒妄扳

以安善良事照得私鹽之禁經過地方層層盤詰
立法可謂無遺矣然而無賴亡命怙惡不悛或聯
舸列艦或聚黨成羣一遇盤獲動輒狡口飛噉某
爲竈產某爲秤手某爲發本及至拘提到案百無
一實或狹睚眦小嫌或涎家道殷實甚至從無一
面奸囑妄扳庭鞠之下搶地呼天覆盆求雪者比
比而是而眞竈眞夥即使窮加拷訊不肯供報如
此刁風殊堪髮指嗣後凡遇情輕鹽少者依律止
理現獲其大夥至千斤以上者務必直窮到底何

處收買何處窩頓何人引領情真乃坐敢有妄扳
良善希圖嚇詐者卽將被誣人當堂省釋本犯仍
於本罪外加等示懲

一順治十二年六月巡視兩浙鹽政爲捕緝宜勤等
事照得兩浙三吳幅員修廣襟江帶湖奸宄難詰
窩秤私販實繁有徒各屬設立捕兵原以巡緝私
鹽每至季終聽總巡官彙報以定功罪夫何法久
弊生不但不行巡緝甚且公然構通得受巨梟月
利聽其逍遙出沒遇見孤舟借稱盤鹽剽掠資囊

執鹽誣賴種種不法倚捕興販又特其餘耳嗣後
總巡縣捕巡司衛所巡鹽各官另選殷實者充捕
巡緝毋許仍用積捕務要實獲配引行銷敢有獲
不如額以工食扣抵及以零星小販塞責者立挈
重處其實獲船鹽盡行貯厥非奉憲批不許私變
本院不時差官秤盤如有虛捏官叅吏究其捕兵
照規按季解比如有踰期不解鹽不及額經承一
并提究

一順治十二年六月巡視兩浙鹽政爲禁約事照得

遇兵販比官捕惟欲私販斂迹官引疏通不知私販之源盡出場竈竈戶煎鹽盡售官商配引顆粒不售兵販則兵販豈能自煎然竈戶售私皆緣保伍疎於覺察官攢怠於稽查立法不嚴故滋其弊也嗣後挈獲私鹽問官必當嚴鞫鹽出何場煎自何竈窩秤是何姓名直窮到底官攢懲以疎縱保伍治其通同一并招解又有奸蠹借名移涵就柴依山搭舍如紹之夏履橋興塘埠海山等處鹽舍煎燒潛通山販大侵諸義浦武引地業經前院行

道差官拆毀因衙蠹爲之護持未能盡去而此輩
竟不知有三尺矣除一面訪拏外所有依山盤舍
盡當拆毀止許沿海煎燒不許仍畱舍基以滋重
勑再如杭之螺螄埠係泊舟通津金衢嚴廣行鹽
要道一帆可通奸販不用包捆不懼巡緝不須掣
放日夜搬運私行則官壅勢所必然著將各舍速
行拆去應移蓋觀音堂處所不許遲違至於各商
給單買補必須赴場挂號方許收鹽入厰印單截
角照引額裝包然後出厰運所聽拏不許仍借東

場打引西場買鹽既無憲單到場又無引目截角
構串牙僧私搆私運官商自恣私販之路紊亂鹺
規大千法紀嗣後各場官攢團保商竈人等務遵
憲頒部式按月實填團竈煎鹽額數并配引商名
引數商結送院查核敢有故違怠玩定提究逐毋
致噬臍

一順治十二年七月巡視兩浙鹽政爲懇復舊額以
甦偏累事據嘉所綱商汪錫等呈稱切照嘉紹二
所派額行銷俱有一定之規嘉所原額歲銷二十

一萬六千一百二十引自七年春季紹稱山寇竊發一時權宜暫移代銷增額至二十六萬八千二十四引歷今五載引壅三季課缺半年今紹所盜戢如故戶口繁集理應復舊改正伏祈准飭運司嘉紹俱照舊則納課錢糧俱照舊則徵收庶嘉所偏累之苦獲蘇紹所應有之額仍復

國課攸賴等情批運司確議詳報去後隨據運司詳稱該本道司查看得嘉所舊額每歲行鹽二十一萬六千一百二十引自七年之春以紹所額引內

議改四萬七千三百零三引於嘉所代銷此一時
權宜酌盈劑虛之策總期鹽法疏通

國課無虧原非經久之常制也適年以來嘉所額數
繁多以致引壅課墮紹所寧戢如故戶口繁集則
嘉所代銷之壅引自應改歸紹所行銷各仍其舊
是以網商汪錫等有懇復舊額之請今據杭嘉紹
松各所網紀衆商從公酌議紹所雖稱寧戢猶有
產場未平收同一萬八千引念杭居嘉紹二所之
間左右皆可就利亦收代銷七千三百三引以十

一年秋季爲始入額輸課編單嘉所仍代銷二萬二千引以足引額等因又查十二年十月初一日蒙批允紹所綱商章同春等爲壅額仍歸原地等事呈稱紹所收回額引之內改歸嘉定縣二千二百引常熟縣八百引查照嘉所納課行銷等因紹所實收回一萬五千引則引目均平課額無缺各商咸得其宜矣今公議允協理合據實呈覆等情前來擬合呈詳伏乞裁奪批定以便行令遵照永爲遵守隨批課引各所通融裒益均算似或可行

但須酌定經久可守纂入鹺書著成令典復行運
司去後據運司詳稱據杭嘉紹松四所綱商戴茂
等覆稱改額收額緣由前經酌議妥便具呈回覆
已蒙恩准商等取具遵依永遠遵守今具遵依二
紙伏乞准賜粘繳覆院批允纂入鹺書庶獲經久
等情該本道司覆看得嘉所舊額每歲引鹽二十
一萬六千一百二十引自七年春季紹稱兵戎竊
發改額四萬七千三百零三引於嘉所代銷近年
以來嘉所引壅課墮故綱商汪錫等具呈憲臺批

司請復舊額仍歸原地行銷前據四所綱商議覆
歸還紹所一萬五千引嘉所仍代銷二萬二千引
杭所收銷七千三百三引嘉定縣二千二百引常
熟縣八百引以足引額前詳已明茲蒙憲批備行
各綱商覆議妥確并具遵依前來擬合據詳伏祈
准賜批允以便纂入鹺書行令衆商經久遵行等
因前來隨批既經議妥准如詳纂入鹺書永遵
一順治十二年十二月嘉興分司爲引鹽久不至州
懇憲飭司督商運賣事據廣德州申詳鹽關

國課欲足課額必禁私販本州界在東南僻隅四塞皆山北連浙地安吉孝豐長興等州縣山徑崎嶇陸道多歧肩販者多係浙省奸民越境之私鹽細查先年原有腳票每鹽一引計二百四十斤小民肩販每百斤給與腳票一張衝要隘所著巡鹽人役查驗故江浙有分而官私之鹽有辨等緣由蒙批腳票當年奉裁必有深意據詳復設以緝私鹽是否可行該司從長酌議確詳蒙此遵卽檄行杭嘉二所綱商從公酌議腳票應否可行據實呈覆

今據杭嘉二所綱紀衆商汪玉澄等公議呈覆浙
西廣德州地轄江南鹽食浙省引赴州開鹽貯四
安以俟四鄰肩販運州變賣年有定額向銷無虧
事經久而商民兩便禁勒石而案墨未乾蓋緣州
離四安鎮六十里水窮陸起人力最少腳費極重
民苦價高難食商畏費重難銷且州城民有幾何
仍賴四鄉販賣抵州赴鎮路亦相等販甚樂從無
柰本州俗悍民刁凡市棍捕僧以及好事子衿串
通經承蠹胥思借巡緝作奸利給小票不顧病

國厲商奉禁不啻再三又經頑衿滕州詳請已蒙前
院移會江南按院督學提犯究懲行學戒飭取具
不違甘結在案仍立碑永禁相安有年久而不變
今該州未審來歷不察成規以缺額爲詞兼思給
票非但滅經久之成規是將驅商入甯罄商膏以
饜奸貪商盡裹足額課奚賴將來定成廢地伏乞
詳覆永禁遵守等情該本司查看得廣德州之引
鹽向例各商引投州開鹽在四安鎮拆賣與民挑
送入城轉鬻則商無陸運之艱民免淡食之苦法

至善而歷行久矣案查順治九年間該州據劣衿鄭啟晨等呈詞欲更舊制令商陸路運鹽至州住賣請詳前院致蒙查究行鹽事宜悉照舊例行州勒石永遵在案何該州復有腳票之請欲借稽察之名以遂奸胥科索之術茲據杭嘉二所綱紀衆商公議呈覆前來所當亟請憲批嚴行禁革以安商業永遠遵行至如該州詳文內云長興縣查則云江南廣德之鹽及本州則云長興之鹽未免趨此失彼引鹽缺額并飭住商此後照額派銷仍循

舊例引投州開鹽在四安鎮拆賣轉運入城以濟民食等因具詳鹽院奉批腳票不便重設本院蚤已洞悉奸蠹之術該司嚴行勒石永禁仍飭往商循行舊例毋許踰案蔡入離書蒙此合行勒石永禁遵行

一順治十三年八月巡視兩浙鹽政爲鹽竈事照得稽煎竈戶煎鹽私售設有憲簿稽查法誠至善邇來官攢團保不肯實力奉行惟是虛捏填報是不澄其源而欲清其流不可得也今後煎鹽數目開

報不實罪治保伍各商領單買補必先赴場挂號
方許收鹽入厥印單截角照額裝包然後出厥運
所候掣填明入場出場日期繳院磨對若無憲單
引目敢構串牙僧私搨或憲單日期填不以實查
出官攢責逐

一順治十三年八月巡視兩浙鹽政爲鹽竈均關鹽
課除蠹棍以安善良事照得商人挾資輸將竈丁
煎鹽辦課皆關軍國急需

朝廷著有優恤之典近來奸婪胥吏場蠹霸棍措勒

索詐靡費無窮若非痛加禁革何以甦茲商竈凡有鹽務衙門皆宜悉心撫恤務使商竈樂業苟有前弊許被害之人據實赴告以憑挈究如有悍將彊兵捭賣彊買致虧商本有司聽信衙蠹私派雜差派買官物及逞私欺壓鹽商許商人赴院告理官弁叅處兵蠹挈問至於六所綱商爲衆商領袖凡有興革事宜不妨從公條議如有不肖奸商作弊害鹺及喇虎光棍冒充商夥呼朋引類假公濟私挾仇詐害妄借條陳擅行瀆援者立行枷號問

遣綱紀徇庇不行舉發治以連坐之罪

一順治十三年八月巡視兩浙鹽政爲禁約事照得
官鹽之阻塞固由私販之橫行而今日浙西劉河
吳淞福山沿海一帶兵販更甚緣三吳與淮泗對
峙假以會剿爲名連艘列艦挾矢張弓卸買城市
疆極官商勒限完價有司莫敢詰問官捕無敢搜
鋒此皆水師將領鈴束不嚴以致梟惡婪弁通同
貿易坐享厚利侵課撓法莫此爲甚雖經前院題
叅一二以儆不肖而根株猶未盡絕除一面嚴飭

外如敢仍蹈故轍將領叅挈兵丁置法庶幾源潔
流清各宜自愛勿嗜小利致干重典

一順治十四年正月巡視兩浙鹽政爲區別民竈以
杜紊占事照得民田竈蕩各有界域近有附場縣
分里遞人等將開墾竈地報入有司以抵民產而
有司亦卽丈入民田數內攘爲己功夫蕩地坍漲
不常今因其開熟改爲民田倘一時坍塌從何抵
補若聽其開墾而不令陞科固啟奸人影射之弊
如因其開墾而奪以與民又重貧竈包賠之苦亟

當遴委賢員徧歷丈量在民田界內者聽有司丈
入民額均糧在竈田界內者仍入竈籍陞科勒石
杜爭違者治罪

一康熙元年八月巡視兩浙鹽政爲嚴飭實力巡查
事照得兩浙地方原屬水鄉支河港汊遍地皆通
舟楫若不嚴加防範勢必銜尾聯檣莫可遏抑本
院念閣

國課不得不爲未雨綢繆之計除有汛防地方照舊
盤緝外其向未設兵處所又係私鹽出沒必經之

河道該管汛弁酌量撥兵晝夜巡查果能擒獲大夥私梟報官者分別獎賞務使私梟盡絕官引疏通倘有借巡興販及賄通縱放情弊察出定行重究

一康熙三年五月巡視兩浙鹽政爲飛渡最爲鹺害稽察在所首嚴特飭不時查驗以肅功令事照得掣過引鹽一時不能盡運在杭則停泊德勝猪圍二壩在嘉則停泊瀛塘橋在松則停泊沈垵在紹則過三塘九壩堆貯義橋新壩以便稽查此相沿

舊例也乃有不肖奸商竟不完課領程密地飛渡
又有船戶欺謾該商肆竊偷賣恐致敗露則販買
私鹽捆包充數兩者弊端神出鬼沒以致引壅課
絀較之私販罪又甚焉嗣後該批驗所大使不時
親身查驗如無前弊按月具結送查倘有奸徒仍
蹈故轍弁髦

功令該員飛報本院以憑鎖拏無論商人船戶一并
嚴行究處該員受賄庇縱察出題叅

一康熙四年十月巡視兩浙鹽政爲嚴查私秤以清

鹽法事照得鹽徒之有私秤猶盜賊之有窩主也盜無窩主則無地潛蹤鹽無私秤則無從售買近訪各場埠有等無藉棍徒公然招引梟販執秤抽牙而票引肩販利於速賣遂相率蟻聚是私秤之弊實爲阻壞鹽法病根嗣後各須痛改前非毀轅易轍私絕則引疏引疏則課足本院專司鹽法蚤夜思維必拔此病根則私鹽自無捷徑將不禁而自絕矣敢有仍蹈前弊告發訪聞立挈杖斃速宜悛改

一康熙五年八月巡視兩浙鹽政爲嚴掣場棍安商
裕課事照得禁治無藉爲清理鹽場首務訪得仁
和等場有等棍徒名爲長布衫又名好漢又名場
虎專一在場兜攬官商包買引頭玩法作弊生事
害人每遇商人到場買補則三五成羣扛幫把持
卻將鹽銀總領入手攙和銅鉛散與竈戶及至還
商鹽斤則又攙和灰土商竈吞聲飲恨莫敢誰何
若不急爲禁戢蠱害何極嗣後商人入場買補聽
其自行憑牙面同竈戶交易收買完足速令打引

出場不許前項棍徒干預病竈病商敢有仍前扛幫兜攬肆行不法者許被害人呈告以憑拏問

一康熙十二年巡視兩浙鹽政爲禁約事查得舊例有司設立捕兵鹽場編立保伍各行巡緝定有界址爲憑捕兵保伍在於團界之外巡緝販徒不許下團騷擾各有明禁址容違越但今巡緝兵役多有不遵禁例仍復下團騷擾一遇竈戶挑運上倉賣商官鹽概作私鹽妄挈送官致貧竈不得安業應令各該分司及各府廳衙門出給告示嗣後捕

役止許在於團界外巡緝販徒不許下團騷擾其
各竈有離團界或於村野空僻去處私煎通同販
徒貨賣者不論保伍捕役人等俱許緝拏報官至
於各場竈煎下鹽斤務堆在倉聽商買補仍赴本
場報數場官卽給印信號票一紙上書商竈煎買
鹽斤數目齎付挑運人役收照敢有捕兵下團矣
拏騷害許竈戶執票送官依律究治其鹽票仍付
商人齎繳本場查考

一康熙十二年巡視兩浙鹽政爲申嚴船戶應捕矣

告事照得商鹽出場雇船裝載各有船戶類多積
猾一經掣畢夤夜收買私鹽倣照引鹽大包裝灌
混於艙內運到住賣地方引鹽未發私鹽先賣或
遇盤驗事露往往罪及商人以後商鹽經過盤驗
地方該府行委廉能官二員照引盤鹽止點包數
不必逐包秤盤致滋多事設有夾帶罪及船戶仍
行文并究窩家秤手不許累及商人若果商人夾
帶許船戶於灌包之時密切首告據實罪懲事後
扳摺決不准理再查各處巡鹽應捕俱係無藉之

棍充補大夥鹽徒窩家腳頭內外交通暗受詭巡
月錢常例非惟不肯捕緝反爲護送出境如遇查
比鹽斤慮數不足小則挈肩挑以塞責大則誣商
鹽以邀功甚將自己鹽斤裝入平人船隻誣陷重
罪鹽船沒官以後各該總巡巡鹽等官嚴加禁約
不許積捕人等挾詐騙害敢有故違定依律例究
遣

一康熙十二年巡視兩浙鹽政爲嚴禁鹽徒用強逼
買私鹽事查得浙東商鹽由漁浦出大江浙西南

鹽在瀛塘橋停泊有等鹽徒專一裝載私鹽恃強
逼買不問船戶允否亂拋過船無銀逼令寄搭浙
東至富陽浙西至蘇州起賣若船戶報辨反誣夾
帶百般索詐以後凡遇此等密報所在官司依律
拏究如容隱不舉一并治罪

一康熙十二年巡視兩浙鹽政爲嚴禁關津刁索等
事本院訪得所屬關津遇有真正私販鹽徒反行
賣脫至於運到商鹽每每託名盤驗多方刁索商
人利在速放甘心受騙又有地方豪棍索要斗面

搭地等錢而巡鹽官捕亦多藉口盤詰需求常例以後關津及巡鹽官捕非奉院文不許擅將商鹽指稱盤詰指索常例市棍奸牙亦毋得用強科擾如有此等許商人指名陳告以憑挈究

一康熙十二年巡視兩浙鹽政爲嚴禁龍潭尹村棍徒索詐商鹽事查得武進無錫宜興三縣界龍潭尹村地方乃商鹽必由之路有等棍徒視鹽船爲奇貨多般紮詐或將各橋下填塞石塊覬覦起駁需索駁鹽或挈米豆數升指稱換鹽竟自上船下

手強挖屢致控告抗不投審商船畏不敢前致令各縣戶口缺鹽民嗟淡食除已往不究外今後如敢復逞故智定行差官親拏決不姑縱勒石永禁一康熙十二年巡視兩浙鹽政爲嚴禁江防乘機搶匿商鹽事查得浙江紹興府坐臨山陰蕭山二縣地勢低窪乃商鹽堆梁要處每遇江漲全賴塘壩圍護若漲水生發衝坍塘壩地方船戶腳夫人等乘機搶匿運往鄉鎮貨賣以後春水泛溢之時各該捕役地方人等務要嚴防前盜但有違犯卽便

密挈從重究遣

一康熙十二年巡視兩浙鹽政爲飭禁女埠地棍借端挾詐事照得浙東商鹽運往開化常山等縣住賣先在蘭谿女埠鎮分簍許將包索燒灰瀝滷煎鹽每被棍徒指爲私鹽索詐以後勒爲定限包索煎鹽聽商人船戶徑自變賣不許指私勒索

一康熙十二年巡視兩浙鹽政爲嚴禁市棍把持以肅鹺政事照得兩浙商鹽因時出產價有低昂若值沙場坍塌雨暘失調產鹽甚少商人貴買於場

安肯賤賣於市乃各處棍徒假以鹽貴欲平市價或鼓衆把持沿門索詐甚至乘機聚搶相率成風深爲商厲以後凡有商鹽貿易俱要貴賤兩平交易如有地棍把持搶詐挈究卽以白晝搶奪論

一康熙十二年巡視兩浙鹽政爲嚴禁巡船入場以安竈業事照得從來設立巡鹽員役例在離場十五里之外鹽梟出沒處所防禦協擒猶恐倚捕與販嚴禁巡船不許入場在場責令官攢稽煎團保協緝公私互察立法最良近訪巡鹽員役假緝獲

爲由逼歷各場恣意夾帶場官不能遏團保莫敢問間有事敗將逃販私鹽掩飾是委牌爲護鹽之符巡鹽爲興販之路無怪乎買補之不前而官引之壅滯也嗣後止許在於離場州縣鄉鎮地方偵緝除一面行令各場立榜遵飭外敢再故違仍前入場興販者許官攢商竈人等協挈送院比民販私鹽之條加等究擬

一康熙十二年巡視兩浙鹽政爲嚴飭邊陲遏販以固藩籬事查浙西太倉常熟浙東諸暨義烏爲私

鹽出沒要津土著捕役每係鹽梟詭變姓名積戀
充當刊刻小票照驗月受常例且有朋分本利倚
借挈解功鹽批文影射夾帶護送交卸窩家秤手
間或敗露則爲打點賄脫司巡釀縱成風侵害引
地蠹蝕

國課咎將誰諉嗣後該州縣務期禁遏毋使疎縱虧
隨額引考成之典法在必行斷不姑息

一康熙十二年巡視兩浙鹽政爲禁約事照得常鎮
二府乃民人繁庶之處應宜鹽食數多因孟河口

對直淮鹽呂四場分僅隔一江私販甚易若不亟
爲截捕爲害匪淺議於孟劉二河口岸亟督防守
將領常住把截嚴杜興販以遏越江私販之奸勿
得疎懈

一康熙十二年巡視兩浙鹽政爲禁挨賣以疏積滯
事查得賣鹽地方憑水程到日先後挨次發賣近
有豪惡巨商搶運先登希圖貨賣以萬室之邑盡
食一商之鹽致奸商視爲專鋪生理坐勒高價串
通經紀任意低昂卽鹽色如土價值倍增小民艱

於買食其勢必歸私販私販既行商鹽日阻無論
後到商人坐受羈縻卽豪力占先者亦不免初通
而終塞矣以後凡遇引鹽運到地方驗無夾帶等
弊不拘到埠先後並聽公平發賣不得仍前挨次
致生壅滯違者卽以阻撓鹽法拏究

一康熙十九年七月巡視兩浙鹽政爲飭拏兇蠹以
安商業事照得商人運銷與私梟勢不兩立每有
奸商借官營私灌包飛渡自蹈法網者固不足惜
至於殷實良商兢兢守法愛惜身家者奚止什居

八九開運住賣從無點污竟有地方官弁擒獲私
梟到官不指爲某商發本則指爲某商銷賣因而
承審有司不分情僞視鹽商爲几上之肉恣意勒索
不飽不休迨至辨理得雪梟徒不過治以本罪而
良商之身家無不立破矣嗣後該地方官掣獲大
夥私梟務必嚴究的實夥竈依律審擬倘有衙門
積蠹拴通巨梟扳累良商者承審官訊明卽予開
釋勿得借端詐害倘有不法奸商違禁行私以及
灌包飛渡者許地方官察掣詳院倍究不貸

一康熙十九年八月巡視兩浙鹽政爲嚴禁竈戶拖欠商鹽以速轉輸事照得商人入場買補例將課銀憑牙預期付竈以備柴湊日逐煎鹽交商貯厰聽候捆配其有馴良竈戶按季交清商竈均便有等刁頑之徒商課到手視同已資鹽交過半任催不應反有鑽領商課恣意花費粒鹽不交致悞配掣深堪髮指嗣後敢有刁竈仍蹈前轍經年累月吞蝕課本臨掣無鹽病商轉輸者一經告發定將頑竈提掣重究

一康熙二十年六月巡視兩浙鹽政爲清查鹽船夾帶之弊等事照得兩浙行鹽地方上通徽嚴衢廣下達蘇松常鎮發運全憑船隻是以掣冊填註某商鹽若干引船戶某以便稽查也遂有不肖船戶乘機夾帶賄通鹽捕縱放過行并有夾底夾艙攬和添灌欺謾耳目一至發覺累及本商身家立破若不嚴行查究弊將何底嗣後鹽船入場捆運報明場官親身查驗無弊方許裝載掣後運銷所官親身查點程引相符方許開行至於沿途隘口應

行盤驗之處照例逐引點清逐包過秤驗無夾底夾艙添灌等情方許過關如有前弊登時飛報以憑提拏法究巡鹽官役亦不得故爲勒措

一康熙二十三年五月巡視兩浙鹽政爲牙鋪務在得人遴選以保商課事照得商鹽到地全憑牙鋪發賣倘或委託匪人則商本因之虧耗及至控官追理十無二三總由不能慎始之故嗣後各縣住商鹽牙慎選殷實之家由縣取結申報方准納稅給帖充當以杜侵漁之弊如有棍徒混結濫充蠹

商病鹺耗折課本事發查明具結之人責令賠補
務使商本無吞噬之患慎勿故違

一康熙二十四年七月江南蘇州府常熟縣爲海禁
悉開貿捕奸梟橫販無稽等事案照先奉前鹽院
憲牌前事內開理鹺之法首重緝私裕課之方必
先疏引兩浙歲額正引七十餘萬道派銷於浙江
者什三派銷於江南者什七而江南行鹽地方雖
其閒形勢不同大率以襟江帶海連跨淮揚者爲
私鹽易入之邊隅浙江屏藩之門戶矣茲查常熟

等邑隸係蘇州鹽銷松所祇因對峙兩淮之金沙
餘西餘中餘東呂四等場又比鄰崇明之天賜場
越販私梟一帆立渡自康熙二十年福山港奉開
官渡船隻往來如織奸梟滿載淮私揚帆直侵內
地并借蕎蜚醬麪插和私鹽公行興販今奉大開
海禁下遂民生而梟徒從此愈繁夾帶因之益盛
蓋常熟等縣與淮場相距水面不過百里朝發可
以夕至故淮鹽欲入先此經由若法網稍疎則常
太嘉崑等州縣松所十萬之引課首被其殃江南

內地什七之

正供累數十萬繼遭其害關係誠非渺小雖經節次嚴飭其如該管官弁泄視鹺綱梟徒奸棍巧販疊出以致淮鹽遍侵浙地爲害無窮茲特具疏題請部議甚爲嚴切詎容仍前藐玩況各地住賣官鹽民間日食不過零銷所賴醬菜二市方能多售冥頑之輩謂醬菜非關禁例任意橫販插和私鹽更兼魚鱉蜆蝦等項無不夾帶試問派銷之引安望疏通應徵之課焉能充裕合行申飭備牌仰縣卽

便移行各文武官將一體欽遵在於沿海沿江一帶各港汛墩嚴行查緝凡收稅衙門於報鈔船隻概行僉驗并禁渡船徇縱官役夾帶私鹽申飭保甲不許容隱嗣後內地捉獲鹽犯如有前項醬麪煮菜蜚魚等物爲罔插和私鹽者根究何場出產何竈所賣何處入境將該管疎縱各官照例題叅人犯按律治罪船隻鹽貨一並入官仍於單開各地方勒石立碑永遠遵行該縣仍大書告示遍行曉諭俱毋違錯先具遵依送查等因并奉鈔粘原

題疏彙內單開并福山徐六涇白茆鹿苑等地方
勒石遵行

一康熙三十六年七月巡視兩浙鹽政爲嚴禁赤棍
冒商紮詐以安鹺業事照得兩浙鹽商資本厚薄
不同一遇消乏其家子弟身無片引猶然冒商遂
有光棍唆蜂結黨害人飛殃燒詐殷實良商疊受
荼毒痼弊已非一日本院莅任以來訪得此等惡
習最爲兩浙大害除已往不究外嗣後敢有前項
棍徒仍然冒商囑商夥告夥證者一經告發審實

定行按律重究各宜改圖勿再甘心罹罪

一康熙三十年十二月江南常州府武進縣爲叩憲
勒石永禁恣擾以安商業事蒙本府信牌開蒙鹽
院批據商人王臣等呈前事詞稱伏讀謹制遵

旨奉憲凡商人遠來貿易寄居浮住一應雜派差徭概
行優免商等掣配武進縣引鹽急公辦課全賴住
賣獲安庶幾課餉不匱奈地方匪棍串通奸胥欺
商異籍視爲魚肉如修城修學造壇修船開河牽
夫等項非苛索出銀卽強派力役以致商等礙難

安業竊思商人辦課終歲不遑從無苛派差徭之事且優免旣蒙

恩恤豈容胥捕擾害伏乞憲批常州府轉行廉照勒石永禁科派等情奉批引商例有優恤豈可混派科擾仰常州府飭縣勒石永禁等因奉此查達部鹺規開載商人優免雜差事例內開鹽商遠來貿易寄居浮住委當給帖優免但不依期換給恐改業者得以影射新充者反無執照以後令綱紀商人將現在充商寄居浮住者開報花名住址與綱紀

冊符同該司卽便置帖呈送本院鈐印發司轉給
執照凡遇一應僉報大戶督工辦餉火夫差役等
項盡行優免其帖仍須一年一換以絕弊端等因
又查本縣前任知縣黨文任內曾給有奉憲優免
文帖舊帖現憑今奉鹽憲批據各商呈請勒石緣
由相應仰遵勒禁但恐有冒商邀恩情弊除勒石
遵守外仍應查照住賣引名置帖給與印照庶鴻
恩不致濫邀商業永無淪替等因具詳蒙本府批
開商民總屬

朝廷赤子皆當矜恤今既蒙憲恩恤商須分涇渭毋使奸僧販戶冒濫夤充以致偏累窮民仰縣查照現在完課引商置帖給照不得一帖數戶影射朦朧賄免等因到縣蒙此除經查照現在住賣完課引商造冊開報置帖給照外相應遵憲勒禁爲此仰闔邑里甲民人知悉鹽商辦課行鹽寄居浮寓凡遇雜徭如修城修學造船修壇開河牽夫等項概行優免該經承里甲毋得混派滋擾

一康熙四十三年九月西路場鹽課司爲離制首嚴

竈籍收鹽懇憲加給嚴示永禁善政久垂事康熙
四十三年八月二十九日蒙鹽法道憲牌內開蒙
鹽院批據商人汪文瑞等呈詞開稱切商等祖父
相承買補西路場其中有自己掣銷者有代親族
收買者俱係徽籍充商急公趨掣其住場竈戶以
及土著編氓從無挂秤收鹽之事鹺制禁令首嚴
毋容紊越蓋因竈戶只許煎燒歸商配引不得收
積鹽斤自煎自賣而土著民戶一經收買則構梟
興販其弊害有不可勝言者近蒙憲令整肅鹺綱

嚴示申飭但恐不法之徒串通豪竈結連私梟陽
奉陰違均未可定必得勒石永禁庶可杜絕將來
伏乞恩賜加示嚴禁飭場取具遵依勒石豎場永
禁如有覬覦不法立即嚴提盡法究處俾鹺政肅
清弊害杜絕等情蒙批竈籍收鹽重干鹺禁運司
確議速詳蒙此本司查得兩浙引目歲計八十萬
餘道掣銷引鹽全藉各場買補諸商真偽莫辨故
必編挂憲單開載某某季分商名引數照場搭派
限以月日法綦嚴也各所商人領給憲單有自行

赴場收買者有辦課在省商夥代爲買補者鹽斤貯厥捆運候掣是掣銷之商雖非買補之商而掣銷之鹽是卽買補之鹽各場皆同不特西路一場爲然也今據商人汪文瑞等呈稱任場竈戶以及土著編氓挂秤收鹽有干鹺禁連名具呈蒙批查議第不法奸民惟知射利罔顧鹺制並無商人保結私自開秤收買鹽斤窩頓構梟與販均未可定非奉憲行嚴禁恐蔓延滋甚況竈戶日煎鹽斤除配商外止令存畱在倉毋許攜歸以防囤積今任

場竈戶土著編氓一概不許秤收買以絕違例
窩頓之弊似亦杜私肅鹺之法也詳候憲臺俯賜
察奪頒示該場勒石永禁庶奸徒知有法紀鹽盡
歸商課掣無悞裨益鹺政匪淺矣蒙批該司速飭
西路場勒石豎立通衢曉諭永爲遵守敢有住場
竈籍土著編氓勢豪奸棍違禁挂秤收買致滋私
弊立即詳解以憑盡法究處倘該場徇隱不報別
有發覺定以溺職叅斥仍取遵依并碑摹呈驗蒙
此仰場遵照立即鐫碑豎立通衢曉諭闔場竈籍

以及土著編氓一概不許挂秤收鹽以杜豪強奸
竈固積構梟與販至竈戶日煎鹽斤仍令買補各
商照常收買歸販配引毋許攜歸國積私售等因
遵奉勒石

一康熙四十五年七月鮑郎場鹽課司爲瀝陳剝竈
陋弊籲憲詳請勒石永禁事康熙四十年五月初
三日蒙鹽法道奉巡撫都察院批本道呈詳看得
鹽場竈戶居處海濱惟賴刮土淋煎辦課資生風
雨寒暑不輟最稱勞苦本司莅任稔知各竈艱苦

訪聞不肖官役沿習往例借端滋擾隨將總催諸
項名色並本場一切陋例嚴加禁革屢經頒示通
飭在案今據鮑耶場竈戶姚冲謨等連名額請禁
止海鹽縣公捐之項查民竈各有版籍而該場地
界雖屬海邑該縣奉有應捐理應自備未便派累
場竈且公捐名色現奉撫憲頒示通行禁革毋許
仍前派擾里民官役尤當凜遵奉行茲據呈請在
縣有公捐及差役至場供給當日飯食等費在場
有現催保伍諸役督煎稽煎稽賣查比鹽斤過堂

金匱要略卷之二十一
三
滾簿查竈鍋鍵捆運各衙門書差規例等項名色
各款查以上錮弊該竈戶所控屬真相應詳請憲
臺批示通飭場縣一體凜奉禁革勒石遵守庶不
場竈戶得以安業煎辦而積蠹奸胥不復藉派擾
累等因奉批如詳通飭勒石永禁倘再違犯定行
嚴叅究處仍候鹽院批示等因又奉鹽院批據詳
海鹽縣仍借公捐名色派及於場科累竈戶殊屬
不合姑念已往免究如詳嚴禁其凡有場竈之縣
亦一體飭令遵照通飭取遵依碑摹送核仍候撫

院批示錄報等因蒙此合行轉飭勒石永禁爲此
仰鮑郎場官擅竈戶人等遵照卽將詳內所開各
場總催等項名色并一切陋例及有司派取場竈
公捐等項及差役至場供給飯食等費并現催保
伍諸役稽煎督煎稽賣查比鹽斤捆運各衙門書
差規例一並禁革勒石場前以垂永久俾各竈得
以安業煎辦不致積弊復萌擾累倘有違犯或經
訪聞告發官則詳叅役則解究文到卽具碑募馳
送轉繳察核等因備行到場蒙此合行立碑禁革

一體遵奉毋違

一康熙五十五年三月嚴州府遂安縣爲商鹽攸關
國計轉輸全藉疏通合行禁遏刁風遵例隨時貿易
以培鹺政事鈔奉鹽院憲示照得商人挾本行鹽
服勞

王事歲銷八十萬之引目年徵數十萬之額課莫不
由此諸商掣銷辦納是商人責任不爲不重然兩
浙課地邇來外遭私梟侵害內受地棍把持所以
課引日壅鹽法日弛而商業困敝矣本院奉

命視鹺下車以來細加體訪蓋緣引鹽一項價值消長
不齊皆因天時之旱澇出產之盈縮查今歲自春
徂秋霪雨連綿更兼風潮時作塘隄坍塌積澇淋
漓沙土多被衝蕩煎舍半沒波濤海不產鹵場不
產鹽竈價日增倍於往昔在商人不惜重價購買
終難足額是以前院次掣引鹽掣運不及十之五
六再歷任壅引數十餘萬皆因無鹽配掣引不獲
銷積引之課悉皆賠納況課價場本之外水腳舟
車關津盤駁船隻有風波之虞河道有羈阻之患

遲則經年速亦必逾半載方得到地開賣工用浩繁成本甚重今之市價尚慮虧折奚堪再爲阻抑第查民間食鹽每口日用止約三錢以此計算終月不及斤許卽市價尚有低昂不過在釐忽之間何至藉口借端傾害本院復檢查達部鹺規內開兩浙鹽斤因時出產價有低昂商人貴買於場安肯賤賣於市俱要貴賤兩平交易又康熙四十四年間部議應令各鹽差御史務須嚴禁俾私鹽永行杜絕官鹽勿致壅滯隨時得價發賣額課不致

缺欠奉

旨依議劄付欽遵在案今商人已經貴買於場若使之抑價賤賣課源虧耗將何轉輸商民均屬

朝廷赤子本院豈因責任視鹺厚於商而薄於民但鹽本卽是課源若虧耗日深本空課絕倘或歛業通懸關礙

國賦考成均非淺鮮況市廛百物民間需用甚多如米薪布帛等類悉皆隨時貿易並未抑之賤售預定價值之理而食鹽一項豈可獨爲預定價值耶

此皆蠹胥地棍借端侵陷希圖挾制擾詐除一面
再加確訪拏究外合行嚴禁示仰該府屬官吏胥
役商鋪兵民地方里保人等一體知悉凡商人運
銷引鹽接濟民食轉輸

國課必俱凜遵部議恪守鹺規隨時得價發賣貴賤
兩平交易如有不法棍豪奸徒胥蠹仍敢抑勒把
持借端欺詐剝削商脂擾害商業致使引壅課虧
轉輸不繼者或經訪聞或被受害商人指控輕則
飛拏法處重則特疏叅究斷不姑寬該府縣身任

地方務當畱心疏裕勒石永禁等因蒙此勒石遵行

一康熙五十五年四月兩浙鹽驛道爲通飭遵行永塞私徑事案奉鹽院批據商人王益豐等呈請崇明縣改設倉場緣由行道查議隨據杭嘉紹松四所商人汪行遠等呈稱崇邑孤處海中私煎最易徧緝爲難欲保內庭必嚴外戶是以

國朝定制不設倉場祇徵計丁之包課自食本地之鹽斤額設鍋竈八十六副添設卽爲私竈出境卽

爲私鹽復經前院特疏題請申禁在案是一鍋猶禁私添若竟全更定法一害於本商再害於

國課三害於地方等由本道查得額設鍋竈尚多私鹽侵入如竟明聽煎燒勢必公行無忌不但近崇引地受害漸深而杭嘉亦遭流毒開海販入徑之門引梟棍出洋之路欲靖梟而梟愈熾欲足引而引反壅所請不便准行並將歷年崇奸袁陞等施枚等顧一鳳等施仁政等各案疊奉歷憲駁飭不准添設事由備詳申覆蒙批崇梟易侵引地定制

不設倉場卽邑自食煎鍋奉

旨猶嚴添設法防透漏內外截然歷案具存據詳已悉
除將商人王益豐等一詞註銷不行外該道卽飭
該府縣實力查拆私鍋杜絕透越私販仍一面摘
敘簡明事由勒石該道府縣衙門通諭永塞私徑
取具遵依碑摹報查立案等因到道奉此合行通
諭遵行

一康熙六十一年七月江南浙江各府州縣爲豁除
年限船犯以勵巡緝事奉鹽驛道憲牌開奉福浙

總督部院批據太倉州長洲吳縣吳江崑山常熟嘉定七州縣會詳船犯季招銀兩奉陞任浙撫都察院批開前任鹽驛道議詳蕭山縣呈詳功績贓罰將實獲鹽斤船犯分抵功贓免於捕兵名下追賠以勵力巡緣由奉批季招船犯銀兩業經鹽院准審事大人移咨永行禁革緣由到道通飭到縣其院額功鹽等又蒙鹽院通飭豁免窮役得甦積困各邑巡役銜沐憲仁復恐日久朦混重徵籲請通詳浙江各院憲批示勒石永垂不朽等因奉批

如詳勒遵仰鹽驛道卽行飭知仍候各院批示又
奉撫院批開仰鹽驛道查明勒石永禁遵報仍候
各院批示各等因到道仰縣遵照憲批勒石卽將
碑摹申送奉此除各州縣分行勒石外案照事屬
一例爲此將原奉憲行及呈請申詳事由勒石永
垂不朽

一雍正元年九月兩浙鹽驛道爲運鹽官船例無封
捉叩詳飭禁以全額課事據商人葉如春等稟稱
浙東行銷引地上至廣信府屬凡運到廣信之鹽

例由玉山用船裝載抵信每歲行銷浙鹽課以萬計向蒙豫省各憲栽培商等無不感戴不意去歲秋間遭信屬蠹胥輒借漕運爲囑嚇詐鹽船船戶稍不遂欲硬將隻鹽拋擲河灘雨打日曬消耗鹽斤虧折課本且將鹽船封捉耽悞銷賣阻絕運課竊思漕項固屬

國儲鹽課亦關軍餉今信屬蠹胥擅將鹽船封捉索詐爲此連名公叩恩准詳憲檄行嚴禁引課有賴等情到道據此爲查兩浙引課全賴賣地轉輸邇

年以來引課墮墮商力維艱歷蒙各憲洞悉優免
差徭運鹽船隻飭禁不得封捉卽浙江漕船連年
凍阻悉雇船駁運亦不封及鹽艘今據衆商呈稱
信屬胥役借漕運爲囑需索船戶耽悞引鹽不得
不據情詳請恩賜嚴飭廣信府屬禁止封捉鹽船
便商裕課戴德無旣矣爲此備由具詳奉江西巡
撫都察院批候檄廣信府飭禁

一雍正二年正月江南徽州府黟縣爲查取鹽法事
宜事奉鹽驛道憲牌內開案蒙兩浙鹽院案驗奉

戶部劄付內開山東清吏司案呈奉部題銷等因
奉

旨依議欽遵在案轉行各縣遵照外今據商人汪恆聚
汪宏茂等呈爲公叩飭禁等事蒙本院憲批鹽驛
道示禁給碑遵守報蒙此合行知照飭禁爲此仰
縣官吏遵照嗣後黥縣官鹽祁門分銷凡黥商運
鹽到邑俱令彙齊漁埠著落官埠腳夫扛擡上店
銷賣不許載入八都葉村檀口等處鄉鎮地方影
射作弊案離越販其現在達部行銷官鹽之商人

汪恆聚汪宏茂汪恆泰汪時源汪開源汪濟生汪德昌汪聚和等八店俱有本道頒給印烙招牌住賣不許違例無結無牌私開滋弊并移知祁門縣申飭各鋪戶照例分銷黟縣官鹽不得縱私越境挑販紊離致干察究仍勒石禁約以垂永久取具碑摹呈繳備案等因奉此合遵錄檄勒石以垂永久毋得故違

一雍正三年二月都察院左副都御史管理兩浙鹽政爲頒示掣驗規例釐積弊以肅法紀事照得兩

浙巖賦爲

國計軍需所關而掣銷運賣又爲疏引裕課之本不容悖紊成規有干律禁本都院日以剔弊釐奸靖販除梟爲念至於商衆之良頑掣驗之利弊早已悉心採訪無不了然胸臆茲當開掣之期特爲嚴切告誡所有禁飭事宜亟應臚列曉諭凡爾官吏商民人等其相遵守倘敢違悖三尺隨加愼勿輕試自干法網

一禁科擾商人辦理課掣効力公家本都院巡視

浙鹺時存軫恤凡有屬商諸弊俱經嚴飭禁革目
今按所掣鹽本都院向甘淡泊一切日用蔬薪紙
筆等物俱發現銀備買如有借名科派滋擾商民
苦累行鋪者察出定行提究

一重糾舉本都院躬臨按掣執法維嚴但知按剔
弊端毫無情面可顧爾商等各遵禁令謹守鹺規
毋萌欺詐之心甘蹈森嚴之法至於甲商爲一所
表倡發奸摘伏分所宜然凡不私弊亦卽指名糾
舉不得避嫌容隱干咎

一察灰鹽各商買鹽配掣乃係

國課轉運根源且爲民生日用之需故攙和有禁詎
今各場竈戶嗜利作奸慣以灰滷漿鹽混交商販
以致掣後行銷每多灰滓難於售賣厲商病民害
莫大焉爾商等各將運到之鹽自宜淘驗如有灰
滓卽行指報以憑提究不得容隱自悞行銷
一稽引目所官職司查驗必須細心檢截如有舊
季引紙夾雜攙混卽刻稟明查究若檢驗不清致
被本都院察出治以扶同之罪至於攢書備造艚

口文冊必要季分分明數目無錯先日呈送聽候
察核不得草率錯訛

一稽秤掣商人捆配引鹽必有輕重不齊各商遵
部法衡準斤兩預期搃配上掣之日本都院衡鑒
在心低昂寓目爾工腳須細心彈兌秉公敲掣毋
得簒弄手法任意輕重舞弊滋奸如有重斤情弊
察出重處不饒

一嚴到所杭所掣署獨在城中河路窄狹船式相
同最難辨別向聞有輕重兩船掉頭影射之弊其

來已久所以設立號票粘帖識認令各商船鹽概于掣前三日盡抵所下編定號數不許臨時進城其掣過鹽船給票實帖便于查驗則首尾有判然之分可無前項影混之弊敢有藏匿及鹽船逗畱城外臨時趕入者卽以違例查究

一禁夾帶杭所鹽船有藏頭之名每于裝鹽出場之時串通押運人等夾帶私鹽窩頓僻地俟本船掣後過壩偷運上船帶販更有壩上奸徒包做私鹽售與船戶發賣大干法紀本都院察訪甚確除

一面查掣究治外今鹽船過壩著令壩夫船戶開具逐日鹽數并具不致夾帶甘結送查如有前弊嚴挈重處

一釐夙弊嘉所河港四通支流雜出兼之地近鹽場販徒絡繹運掣之際流弊極多如裝鹽船戶藉以船隻寬大有散艙夾底鴛鴦搭配名色以致夾帶零鹽分藏遮掩其弊繁滋本都院知之甚詳除之必力凡赴掣鹽船必要預期編排臨時將篷板盡行拆卸以便搜查至于掣過鹽船俱令停泊瀛

塘橋外不許附近所下致滋奸弊如有故違定將船戶究處

一速運賣掣驗之後卽應領程開運豈容逗畱如杭嘉松三所停泊水次紹所起堆埭地不過一時權宜若使久延不發保無船戶地棍偷灌影混之弊嗣後所掣引鹽通限一月內領取水程到地銷賣不得故延其盤驗及住賣衙門官役敢有悖違嚴禁生端科擾致悞行銷許該商控究

一禁勒指紹所商鹽掣驗之後運至壩上必用腳

夫扛擡壩夫人等自恃非伊莫能過壩矚商船回
空緊要故意畱難勒索重利若遇風雨泥澶反將
鹽包傾擲滲漏沾汚示以不得不從之勢積習相
沿由來已久以商人辦課之引鹽竟視爲若輩索
詐之奇貨殊堪痛恨除現在查究外嗣後再有壩
夫仍蹈前轍故行勒指該商赴稟立提嚴處

一雍正三年十一月都察院左副都御史管理兩浙
鹽政爲奏明兩浙公費事照得兩浙所轄溫台寧
三郡銷引無多商力單薄一切雜費向不派及祇

杭嘉紹松四所每年於每所內僉點甲商數人經
管鹽務內一切公私之費查內中有關工食盤費
食用必不可省者固多而不急之務亦復不少大
約每年所派不下四十餘萬兩除題明歸庫者共
二十五萬八千六百九十兩其餘雜費陋規勢必
不能盡行裁去若不斟酌量減核爲一定之規恐
甲商因而多派則散商資本消乏課額難完是以
仰體

皇上愛民恤商徹底澄清之至意倣照兩淮雜費之例

將浮費量行裁減總計舊存銀十七萬九十一兩九錢除酌減銀四萬四千四百八十兩仍存銀十二萬五千六百十一兩九錢若將此應存銀兩仍令甲商收支則一切無藝之費必仍向甲商需索而甲商不能遏絕勉強應付抑或借名肥已則諸費仍難永減今議將應存銀兩令該道於每年開徵之時齊集衆商核定每引應攤銀若干議明之後每所各給一用印議單照單付送置一公匣收貯臨時動用應支若干著甲商稟明院道分司公

同照依定數給發不許於定數外分毫多支卽或此外有不得已之處亦於應存十二萬五千六百餘兩數內通融節省支銷不得另派院道仍不時稽查如有違例私派私收及官役需索商人應付情弊卽行題叅挈問徇縱並難辭咎庶幾商力不致困乏而課額亦得早完隨經分別應存應減款項造冊具摺奏明在案擬合就行爲此牌仰該道官吏查照牌內奏明事理卽便轉飭該分司并傳諭各甲商齊集衆商人等將冊內核存公費銀十

二萬五千六百十一兩九錢每所每引應攤若干
公同議定各所立一議單呈送核明印發照數交
貯公匣該分司率同甲商經理出入務在畫一均
平不得絲毫偏私凡有應支各項俱稟明本都院
暨該道公同給發不許額外多支並各設立收支
循環二簿送候印發登填其收者必註明某商若
干引交銀若干兩其支者必註明某項動用係某
商領給每至半月將印簿一畱收支填註一送院
道查核其各項銀兩並須加意節省至此外或有

必不得已應用之處俱令稟明公議於應存數內
通融支銷仍俟一年將滿將收支數目款項并節
省銀兩該分司備造清冊呈送以憑核明酌奪如
有違例私派私收及各役需索商人應付等弊該
道立即據實詳揭以憑題叅掣問毋得徇縱并干
咎戾本都院仰荷

聖恩惟有一秉至公以期培商裕課斷不瞻徇情面代
人受過仍將作何奉行歷久無弊之處妥議詳奪
均毋違延

一雍正四年四月巡撫都察院兼理兩浙鹽政爲足課首重買補恤商務在安業事照得本都院巡撫浙江凡屬商民均同一視必期共安樂利以躋敦龐況復欽奉

恩綸暫理鹽務其所以裕課恤商之道亦難稍緩茲准部頒引目八十萬二千餘道到浙除現飭鹽道印作并飛檄各場上緊煎燒外爾商等務必多齎課本廣爲買補本額掣足有餘方著急公其有無力之商覓令有力代銷不得畱難指阻致悞課掣至

於兩浙鹺商之內每有片引不銷蓋引過掣遇事
興波駕題捏控此等惡習殊堪痛恨合并嚴飭爲
此示仰杭嘉紹松溫台正票甲散各商知悉嗣後
務須各安本業上緊配買場鹽照額趲運赴掣竭
蹙辦納課餉慎毋玩延挂欠倘敢仍蹈前轍本都
院執法從事斷不稍爲寬徇也慎毋輕試凜之

雍正四年四月巡撫都察院兼理兩浙鹽政爲飭
禁刁訟誣告之積習以安商業以肅法紀事照得
浙屬痼弊每多健訟而鹺業中尤甚或微隙小嫌

輒起爭端或捉影捕風動成告訐更有一等借他人之鹽蓋自己之引巧立名色希圖取利每以告狀作生涯竟視公庭爲兒戲稍不遂意卽以科派大題妄行上瀆結黨挾制牢不可破本都院下車之始卽已訪察得實今復欽奉

諭旨暫理兩浙鹽務若卽行挈究未免不教而誅合亟嚴禁爲此示仰兩浙衆商知悉爾等務要洗心滌慮痛改前非倘有怙惡不悛仍前借端生釁駕題妄控者一經察出定卽挈赴轅門立斃杖下本都

院言出如山法在必行各宜猛省毋致噬臍凜之
愼之

一雍正四年四月巡撫都察院兼理兩浙鹽政爲剴
切勸導私販亟圖別業謀生免懼

國法以保身家事照得私鹽之禁律例森嚴若有違
犯挈獲到官輕則杖徒軍流重則絞斬梟示煌煌
功令孰敢不遵今查兩浙地方邇年私鹽充斥漸至
莫可禁遏蓋因無知愚民或被梟徒煽惑或爲地
棍誘引俱以販私爲業甚而結黨成羣假冒貧難

名色船裝陸運潑膽公行一遇兵捕巡查輒肆逞
兇格鬪以致拒捕傷人釀成大案者不知凡幾推
原其意不過圖利起見殊不知事發之日本利盡
屬烏有而且身禁囹圄迨至審擬成招身首異處
者有之遣配他方者有之試問斯時本利而本利
已歸賊款求其卸罪而卸罪又不可得別父母拋
妻子棄家園受痛苦一慘至此求免得乎總因愚
而且貪不知

朝廷律例只圖興販獲利罔顧身干法網言念及此

不勝痛恨茲本都院日據州縣詳報患病斃獄者
案牘若鱗披閱之下深堪憫惻用是開誠勸諭以
期悔過遷善爲此示仰按屬官捕兵民人等知悉
當此

昇平盛世各宜安分或農或賈各執一業皆可謀生
切勿仍前販私自罹法網若有藐玩不遵許所在
官役兵捕立時拏獲詳報定卽按法倍處斷不稍
爲寬宥本都院諄諄勸戒無非爲爾等惜性命保
身家仰副

聖天子愛養元元之至意其各猛省毋貽後悔凜之慎之

一雍正四年六月巡撫都察院兼理兩浙鹽務爲特飭酌減鹽價以期商民兩便事照得商鹽運賣上關

國課下濟民食必須公平貿易庶幾兩無虧損今本都院辦理鹽務以來訪得蘇屬鹽價每斤賣錢十四文因市價過昂不便於民是以每斤核減二釐俟新鹽掣後再減二釐其太常崑嘉四處亦照現

賣之價量減二釐隨經出示飭遵在案今查崑山
青浦長吳等處市價仍屬高昂以致民食艱難殊
失本都院商民一視之初心除檄飭蘇松常鎮四
府并太倉州再行查禁并出示曉諭外合亟嚴飭
爲此示仰該屬官吏商民人等知悉務將商鹽按
遠近運腳工本合算照市價秉公酌減定數飭令
商民遵照務使公平交易不許徇隱偏袒有礙
國課民用至於不法鋪戶膽肆攙和灰沙擅用短秤
發賣等弊所在官役卽行查拏究詳聽候本都院

核批發落如敢故違不遵任意昂價病民以及地棍借端抑勒生事擾商者該管官吏扶同徇縱仍前偏累本都院一有見聞定卽叅處決不寬宥均當凜遵慎之毋忽

一雍正四年八月兩浙鹽驛道爲懇詳運鹽之弊恩准更運裕課事本年四月初十日奉巡撫都察院兼理鹽務批溫州府通判詳稱據處州府宣平縣知縣詳據商人龐宏盛呈稱切宣邑鹽額二百引緣邑坐山僻水陸運鹽船簞遞換肩挑過嶺交替

多次沿途不免鼠偷是以攬灰抵重遲延到縣不堪食用以致官鹽壅滯遞年欠課若非設法更運勢必

國課仍然疊欠請將宣邑以後發運引鹽不用草包裹引特設竹筐裝運先將竹筐較秤斤兩除筐合算引數封蓋過關則一路鼠偷攬灰之弊得除淨鹽到宣永久裕課等情據此理合詳請憲臺批示遵行奉批據詳草包改用竹筐則沿途得免鼠竊攬灰似屬可行但筐裝之鹽務要仍符包裝斤兩

之處均未議及作何飭遵恐滋重斤等弊仰鹽驛
道查議詳奪等因奉此轉行溫巡廳查覆去後今
據該廳申稱遵卽轉行批驗所傳集各商妥議間
據溫所商人王大椿等呈稱查得溫所僻處一隅
產鹽於海濱之外銷賣於萬山之中自鹽場裝至
賣地幾經盤駁換簿其掣運艱辛惟溫所爲最而
灰鹽之弊害商害民流毒甚深今考其弊有三一
在場竈之攪和一在船戶之偷拌一在衙蠹地棍
之生事三者不禁而徒改換竹筐其弊終莫能止

也溫所三場竈產惟永邑一場最廣派銷處屬額引亦多查場竈用灰之始鹽將煎乾用灰少許和以清滷名曰灰飲一鍋之中不過杯勺取其易成今則不然平日浮面清滷私煎上白鬆鹽父兄煎燒子弟興販餘下濁滷煎燒交配不待煎乾多用生灰攪和先年常蒙院憲差取各場鹽樣尚有顧忌續念溫所爲遠事差難免滋擾寬恩免取豈期竈戶不仰體院憲恤竈之苦心反爲若輩叢奸之弊茲今欲斷除此弊乞飭該場大使取具各竈戶

甘結五竈互結嗣後煎鹽不許多用生灰只許照前少用灰飲如有故犯除將該煎丁照律究擬外仍將五竈失察同科更於每月起煎之期著令保伍赴就近司掣衙門呈驗鹽樣日後衆商掣運到所驗明包內之鹽照依鹽樣一色潔淨如係溼爛黑色灰鹽卽查買自何場何竈立提該竈並五竈一體嚴究庶幾竈戶畏法其用生灰之弊可止溫所載運官鹽或用本地梭船或用福建三板船每船僅載十引假如一商掣鹽百引需船十隻不能

分身押運此船戶鼠竊拌灰之由來也細查其弊
只用銀二三錢買灰百斤拌入鹽內見滷生重卽
可偷竊二百餘斤價值一兩五六錢不但草包易
於作弊卽分簍後亦可作弊今欲斷除此弊乞檄
行溫郡司掣衙門將本地梭船情願載鹽者報名
入冊編爲鹽字號免其差使只令裝鹽五船立一
船長列爲一幫取具互結并取船長甘結如有一
船作弊四船同罪倍治船長以失察之罪其福建
三板船散居處郡松龍二縣檄行總捕廳照依一

體飭行庶幾船戶畏法其鼠竊拌灰之弊可止商人銷引辦課用價買鹽豈不欲置買好鹽易於脫賣無如鹽遭竈戶船戶之害色味兩變疾首痛心非不欲出首呈究而官良胥暴地棍借事生風或紮詐銀兩或公呈陷害所以衆商隱忍不敢首報今欲斷除此弊乞檄行溫處兩郡各衙門嗣後船戶拌灰許令商人首報只將該船治罪不許胥蠹地棍生事詐害波累商人如有紮詐陷害許受害商人控告卽以光棍律論庶幾蠹棍畏法商不受

金匱要略卷之二十一
一
害而灰鹽之弊可止伏乞轉詳上憲恩准飭行其
弊既去則商人龐宏盛呈請改用竹筐之處未免
紛更不如仍循舊制之爲便也等情據此擬合據
情申覆等情到道該本道查得商人龐宏盛因買
補掣運每遭腳夫船戶沿途偷竊以致攪灰抵重
病民病商呈請將裝鹽之草包改用竹筐此不過
一商一邑補偏救弊之意奉憲批查本道遵行查
議今據該廳申據溫所衆商會議公呈三款殊爲
明切查竈戶攪灰久奉查禁而船戶偷拌與胥棍

生事尤爲商害似應俯如所請轉飭廳縣各官嚴
加查禁實力遵行則裝鹽可以仍用草包無事更
張而偷竊攪和之弊可絕其於引課似屬有益相
應詳覆伏候憲臺批示飭遵奉巡撫都察院批仰
卽轉飭廳縣嚴加查禁先取各遵結報查其改用
竹筐之處併飭宣邑商人仍循舊例遵用草包裝
鹽不得更張滋弊

一雍正四年十月巡撫都察院兼理兩浙鹽政爲愚
民始終不悟再行開誠勸諭務期盡行改業以全

身命事照得鹽務關係

國課私煎私賣重干禁令本都院披閱案牘各屬報
獲無日不有夫與販私鹽一經挈獲輕則杖徒重
則戍辟豈爾民果盡不畏刑法不顧身命耶良由
止知嗜利未曾通盤算計以冀倖免一時並不清
夜自思士農工賈以及百業皆可營生爾民果能
安分竭力謀生何患乎衣食之不豐足況鹽捕一
役最爲爾輩蠹賊爾輩販私必欲買通鹽捕若能
多錢賄囑始得安然販賣稍拂其欲卽行挈獲報

解是爾等販私利歸鹽捕罪坐本身懵懵然如飛
蛾之投火小民愚昧殊堪憫惻今本都院因愛惜
民命起見故不憚諄切告誡爾等自今以後急當
猛省常以父母妻子爲念官刑

國法爲心自不致妄干非義各守本分專務本業以
爲循良百姓豈不身安心樂況一切捕役爾等素
受其累今一旦幡然改業其柰爾何是止有嚴比
捕役之期斷無刑訊爾等之事矣嗟爾愚氓何難
猛省本都院不厭諄切用再出示勸諭三令五申

無非要爾等作一好人以享昇平之福耳爲此示仰按屬一應軍民人等知悉嗣後有能當下改悔務本守正者卽係良民縱有以前私販舊跡因別案牽連發覺者概可從寬不究其有兄弟子姪以及親戚鄰友輩販私之人卽以此示大義轉相勸導令其悔悟改過自新營謀正業以保身家如不悔悟反以苦口爲讐准勸導之人于就近地方官具實將所販私贓一并出首按查得實定加獎賞亦不得以無據虛詞妄行栽害倘終不悛改執迷

故犯一經被獲

王法無私何能更爲爾輩祝網各宜痛改毋致噬臍
凜之慎之

一雍正五年三月兩浙鹽驛道爲場鹽倍貴賣價難
虧呈請隨時貿易以濟商本以保課源事本年三
月十六日奉巡撫都察院兼理兩浙鹽務批據杭
嘉紹松四所商人吳永豐等呈稱兩浙商小本微
買場賣地惟憑時價今值秋冬陰雨土滷不起柴
草又貴場價騰長公籲賜檄各賣地隨時發賣等

情奉批據呈陰雨土滷不起場價騰貴若令長價有累民食若照價發賣恐妨課稅仰鹽驛道從公妥議分析具覆奪奉此該本道查得食鹽一項民間日用必需全賴價值公平貴賤隨時庶幾商民兩利上年因時價過昂蒙憲出示酌減今場價旣增則市價不能仍減亦理勢之必然者似應俯念課額所關賜復上年核減之價以免悞公俟場鹽旺產仍令照時核減庶免累民等因具詳奉批時值陰雨滷希柴少場價加增姑如詳准復核減原

價隨時貿易以全課餉該道星卽轉行各道府并飭四所衆商一體遵照仍不時查訪毋使借端高擡病民俟場鹽旺產之日具詳檄行核減可也奉此除移行各道府遵奉外合行出示曉諭爲此示仰商民鋪戶人等知悉嗣後運到引鹽悉遵院批隨時貿易公平買賣俟場鹽旺產之日再行照時核減該地方官捕仍不時查察倘有奸民用強短價生事擾礙及潑販售私者立卽查拏詳報究懲各宜凜遵

一雍正五年閏三月巡撫都察院兼理兩浙鹽政爲
禁除陋弊以甦竈困事照得兩浙場竈計丁授地
勸舍煎鹽專爲配銷官引而設實有關於

國計民生祇緣場地坍漲不常遂致廣闊靡定乃竈
丁作奸乘此私煎偷售或掩映私竈弊端種種難
以枚舉故釐制頒給印帖以別官私例應三年一
換以杜影混法至善也然而除竈弊卽貽竈害又
不可不亟爲釐剔查往年換給之時鹽政衙門俱
令承差齎發向有紙硃飯食等費每張派取四五

錢多至一兩上下而該場官役又以挂號蓋印名
色任意勒取卽保伍工腳亦有派給奔走酬勞再
加鹽道分司衙門換給竈帖門牌俱有索取計每
竈領帖約費二三兩不等嗟此熒熒竈戶何堪層
層剝剝今團聚已定且當換給之候故特捐備竈
帖飭發各場大使頒給衆竈收領所有給帖陋規
概不許索取分毫除行鹽道分司各衙門一體禁
革外誠恐各竈未能週知合亟出示曉諭爲此示
仰該場官攢保竈人等知悉卽將發來竈帖該大

使于比鹽之期傳齊各竈親行分給卽取領狀彙
送查考慎勿違禁派擾致滋竈困如敢索取分釐
告發訪聞立卽拏究問擬決不輕爲姑縱倘有不
法棍徒串同場霸人等借名派取擾累者許竈戶
就近呈控該大使飛報本都院提究若竈戶私行
派送一有發覺與受之人俱必按名嚴拏從重治
罪該大使徇隱不報察出一并究處本都院言出
法隨各宜凜慎毋致噬臍

一雍正七年六月兩浙鹽驛道爲積弊宜除等事奉

總督兼理兩浙鹽院批本道呈詳查得本道衙門
商縣課項下每兩例有加平三分與同裁存程費
驛務項下公費等項以充起解河工銅斤正腳等
項公用之外每年餘存銀三千餘兩及鹽驛兩項
下庫銀一年出入積零攢總約盈餘銀二千八百
餘兩每年約共銀六千餘兩以爲養廉之用曾蒙
憲臺奏明在案此三分加平銀兩現在收充公用
又縣課每百兩向例有火工一分以爲傾鎔之費
上年六月間已經詳明鹽憲通飭各州縣印官務

將足色大錠起解其一分火工停其收取取有遵
依在案本道復恐管庫官吏書役需索陋規又經
屢次嚴加禁革并飭各縣不得聽信不肖解役哄
騙仍借解規使費名色妄捏開銷并不得於正額
之外多給銀錢資其浪費再三申禁現有案卷可
據並無每千收銀六十二兩之處再查原報鹽驛
兩項一年出入積零攢總盈餘銀二千八百餘兩
乃係從前通收小錠時約計之數自上年奉憲議
定各官養廉通飭遵照之後所有驛務項下錢糧

本道悉原收原放出八如一其商縣課銀亦奉鹽
憲題明改收元寶間有零星小錠亦屬無幾約計
盈餘一項每年止及數百金並無二千八百餘兩
矣然本道恪遵

功令斷不敢於三分加平之外分釐多收上千嚴例
亦不敢以不敷六千之數妄思請補惟是旣奉憲
檄行查理合備細詳覆等緣由奉批舊例添平之
外尚有過半無著者是否書役需索或係解差假
捏仰卽查明釐剔具覆奉此又該本道查得上年

平湖縣原詳內稱每千給解費銀六十二兩原指
向來舊例而言內中或係書役需索亦有解役冒
銷難逃憲臺洞鑒自上年本道凜遵督憲嚴飭禁
革之後現今道庫實止加平三分此外並無浮費
凡各縣解銀兌收時取有解役並無需索陋規甘
結在案本道仰體憲臺剔弊除奸至意又經嚴加
申飭各縣解到錢糧俱係隨到隨收不許需索分
文以期弊絕風清仍現在不時查察倘有陽奉陰
違勒索陋規情弊卽當嚴拏究處斷不敢稍爲寬

縱上千咎戾等緣由於雍正七年五月二十二日
奉督憲批開既據查明禁革並無浮費卽勒石
永禁取碑摹送查仍一面檄飭各屬遵照奉此除
經通飭各屬遵照外合行勒碑永禁凡各屬解到
鹽課錢糧務須隨到隨收庫官吏書各役不許仍
蹈故習需索陋規如敢陽奉陰違一經察出定卽
嚴拏重究決不寬貸

一雍正八年三月總督兼管兩浙鹽政爲調劑買賣
鹽價速濟民食事照得各屬收買帑鹽原因竈戶

煎出之鹽甚多商人本少不能盡買勢必偷售梟徒充斥各郡任意潑販壅引阻課定制將帑鹽盡數收贖原爲恤竈杜私起見並非欲圖官鹽利息盈餘是以收存帑鹽與轉販民食俱經酌定價值以爲折中使民不食貴鹽梟徒不敢霸佔地方近因上年秋冬以至今春陰雨不時奸刁竈戶見不能賣私自便遂乘機藉口竟不趕煎濟配以致出鹽甚少目前又屆漁菜之期需用正殷若不設法將收鹽之價酌增賣出之值平減在場竈未能踴

躍多煎而民間或有貴鹽之慮且從前帑本已經歸補則現在買鹽之銀原屬盈餘項款當此土涵偶絀之時亟應將收買之價暫行酌量加增並將賣價照前再爲平減俾竈戶趕煎濟配而民間得食賤鹽方合因時調劑之道爲此示仰商竈軍民人等知悉本部院已飭承辦鹽務各官凡收買帑鹽俱稍爲量增價值其轉賣民人之鹽俱照從前分別道路腳價遠近酌減交易爾等場竈務須星夜趕煎交貯官廩接濟漁菜二市之用毋得聽信

奸竈阻撓情煎觀望爾民亦須安分守業不得藉名滋事倘有仍前指勒囤積販私不肯交收官厥及鼓衆不法者本部院立即嚴拏盡法重處悔之無及倘吏役短價抑勒店鋪肩販許赴所在有司指名控告查處如不理諭無拘文武各衙門稟報詳究各宜凜遵毋違

一雍正九年九月總督兼管兩浙鹽政爲嚴催乘時收買以速掣配運銷事照得各所秋冬額引例於十一月掣驗前已飭催各商上緊買補在案屆今

菊土旺起正場鹽廣產之候若不乘時收貯必致
貽悞掣期除專差勒催外合亟曉諭爲此示仰杭
嘉紹松四所正票甲散衆商知悉務各多齎課本
星速入場乘時收買貯厰配引聽候示期運掣倘
敢延挨觀望不卽入場收買者一經查出定行究
處不貸各宜凜之慎毋輕忽

一雍正十年十一月總督兼管兩浙鹽政爲嚴行飭
禁事照得嘉所商鹽捆載抵所例應停泊奚家橋
等處一帶河干聽候掣驗今查向有不法船戶將

運到引鹽每於黑夜偷挖鹽斤易換薪米有虧商
本甚有串通不肖商鹽鋪戶賤價收買借官行私
殊屬膽玩合行嚴禁爲此示仰該所商人船戶軍
民人等知悉如有前項不法船戶仍循故習偷挖
鹽斤希圖偷售以及官店偷買私鹽者務將人鹽
並獲解候究處毋得賄縱倘巡役玩不查拏徇情
疎縱一經查出定卽嚴拏究處該員亦大有未便
各宜凜遵毋忽

一雍正十一年七月總督兼管兩浙鹽政爲嚴禁煎

燒灰鹽以除積弊事照得鹽爲五味之首乃閭閻
日用所必需而醬菜鹽斤尤關民間終歲之食用
毋許商竈燒售灰鹽攙和砂土久經飭禁在案今
查得各場不法竈戶仍煎灰鹽暗通場客買貯商
販混行運掣及至到地行銷民間買用合醬醃菜
易於腐壞卽日用調和味亦苦澁至於場員領帑
買鹽原爲商課未經接濟誠恐竈戶售私是以發
帑收買今場員所收之鹽貪圖價賤得以浮冒開
銷更多灰土且挨至臨掣之際方始比追上倉涵

淫暴鹽不堪民食甚爲巇害合行嚴禁爲此示仰
該場官商保竈人等一體知悉凡各竈煎燒商帑
鹽斤務須乾鬆潔白淨鹽交商貯販配掣如有奸
竈仍前糝灰以及插和砂土等弊立即指名詳候
提究若買商仍敢暗通竈戶貪圖價賤買補灰鹽
捆配者掣驗之時一經察出除提奸竈重處外定
將買商一并嚴加究處斷不寬恕該場稽察不嚴
亦干未便各宜凜遵毋得輕忽

欽定重修兩浙鹽法志卷十五終